



REPUBLIKA E SHQIPËRISË
KËSHILLI I EMËRIMEVE NË DREJTËSI

VENDIM

Nr. 92, datë 30.07.2019

**PËR NDALIMIN E KANDIDIMIT TË Z. REXHEP BEKTESHI NË VENDIN
VAKANT PËR GJYQTAR NË GJYKATËN KUSHTETUESE, SHPALLUR NGA
PRESIDENTI I REPUBLIKËS NË DATËN 07.02.2018**

Këshilli i Emërimeve në Drejtësi, i përbërë nga :

Ardian Dvorani	- Kryetar
Vitore Tusha	- Zëvendëskryetare
Arta Marku	- Anëtare /Relatore
Margarita Buhali	- Anëtare
Fatjona Memçaj	- Anëtare
Fatri Islamaj	- Anëtar
Eriol Roshi	- Anëtar

Asistuar nga sekretare **Dorina Dulaj**,

Me praninë e Avokates së Popullit, znj. **Erinda Ballanca**, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,

Me praninë e përfaqësuesve të autorizuar të subjekteve të fluara sipas ligjit për pjesëmarrje, në cilësinë e vëzhguesve, në mbledhjen e Këshillit:

- **z. Bledar Dervishaj**, përfaqësuesi i autorizuar i Presidentit të Republikës,

në mbledhjen e datës 30.07.2019, mori në shqyrtim çështjen që i përket:

KANDIDATI PËR GJYQTAR

NË GJYKATËN KUSHTETUESE: Z. Rexhep Bekteshi

OBJEKTI:

Urdhërimi i ndalimit të kandidimit të z.Rexhep Bekteshi, në vendin vakant për gjyqtar në Gjykatën Kushtetuese, të shpallur nga Presidenti i Republikës në datën 07.02.2018.

KËSHILLI I EMËRIMEVE NË DREJTËSI

Pasi dëgjoji relatimin e anëtares së Këshillit, **znj. Arta Marku**, mendimin e paraqitur nga Avokati i Popullit, znj. Erinda Ballanca, në cilësinë e vëzhgueses së përhershme në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit dhe si bisedoi çështjen në tërësi,

VËREN:

I. Rrethanat e çështjes

1. Në zbatim të nenit 125 të Kushtetutës dhe të pikës 1 të nenit 7/b të Ligjit nr. 8577/2000 “*Për organizimin dhe funksionimin e Gjykatës Kushtetuese në Republikën e Shqipërisë*”, Presidenti i Republikës, në datën 07.02.2018, ka shpallur hapjen e procedurës së aplikimeve për plotësimin e vendit vakant të krijuar në Gjykatën Kushtetuese pas mbarimit të mandatit të ish-gjyqtarit Sokol Berberi.

2. Në përfundim të procedurës së aplikimeve për shprehjen e interesit për kandidim, Presidenti i Republikës i ka dërguar Këshillit të Emërimeve në Drejtësi aplikimet e kandidatëve të shoqëruara me dokumentet e paraqitura prej tyre për përmbushjen e kushteve dhe kriterëve ligjore të përcaktuara në nenin 7/a të Ligjit nr. 8577/2000.

3. Ndërmjet kandidatëve që kanë shprehur interesin për plotësimin e këtij vendi vakant të krijuar në Gjykatën Kushtetuese është edhe z. Rexhep Bekteshi.

4. Në zbatim të nenit 125 dhe 149/d të Kushtetutës, të pikës 2 të nenit 7/b të ligjit nr. 8577/2000, të neneve 229, pika 1 e nenit 234, 235, 236, 237, 239 e 240 të Ligjit nr. 115/2016 “*Për organet e qeverisjes së sistemit të drejtësisë*”, si edhe të pikës 98 të aktit nënligjor normativ, Vendimi i Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, Këshilli i Emërimeve në Drejtësi, në mbledhjen e zhvilluar në datën 05.04.2019, vendosi fillimin e procedurave të verifikimit, vlerësimit, pikëzimit dhe renditjes të kandidatëve që kanë shprehur interesin për vendet vakante të krijuara në Gjykatën Kushtetuese.

5. Në zbatim të nenit 228 të Ligjit nr. 115/2016 dhe të pikave 5, 27 deri 37 dhe 41 të aktit nënligjor normativ, Vendimit të Këshillit të Emërimeve në Drejtësi nr. 2 datë 15.02.2019 “*Për procedurën e shortit të caktimit të relatorëve për pozicionet vakante në çdo institucion*”, si edhe të pikës 4 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, në të njëjtën ditë të mbledhjes së zhvilluar në datën 05.04.2019, është realizuar edhe procedura për caktimin me short manual të relatorëve për secilin nga vendet vakante të krijuara në Gjykatën Kushtetuese dhe për Inspektor i Lartë i Drejtësisë.

6. Sipas rezultatit të shortit manual të realizuar nga Këshilli i Emërimeve në Drejtësi, lidhur me vendin vakant në Gjykatën Kushtetuese, të shpallur nga Presidenti i Republikës në datën 07.02.2018, relatore për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtarja e Këshillit, znj. Arta Marku.

7. Z. Rexhep Bekteshi, si njëri ndër kandidatët që ka shprehur interesin për vendin vakant të sipërcituar në Gjykatën Kushtetuese, në zbatim të pikës 22 të Vendimit të Këshillit të Emërimeve në Drejtësi me nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, është njoftuar me shkrim për tu paraqitur pranë Këshillit për të vijuar me përmbushjen e procedurave të verifikimit të kandidaturës. Njoftimi me shkrim, i kryer në rrugë elektronike në adresën e deklaruar nga vetë kandidati Rexhep Bekteshi, gjendet e administruar në dosjen e kandidatit.

8. Në datën 09.04.2019, kandidati Rexhep Bekteshi është paraqitur pranë Këshillit të Emërimeve në Drejtësi dhe është pajisur me formularët e deklaramit dhe autorizimet që duhet të plotësohen për qëllimet e vijimit të procedurës së verifikimit të kandidaturës së tij. Kryerja e kësaj procedure vërtetohet nga nënshkrimi prej vetë kandidatit të Deklaratës përkatëse, e cila gjendet e administruar në dosjen e kandidatit.

9. Në datën 15.04.2019, kandidati Rexhep Bekteshi ka depozituar në sekretarinë e Këshillit të Emërimeve në Drejtësi formularë të deklaramit dhe autorizimet përkatëse për qëllimet e vijimit të procedurës së verifikimit të kandidaturës së tij, të cilat gjenden të administruara në dosjen e kandidatit.

10. Kandidati Rexhep Bekteshi është subjekt i procesit të rivlerësimit të gjyqtarëve dhe prokurorëve. Rezulton se Komisioni i Pavarur i Kualifikimit me Vendimin nr. 143, datë 26.04.2019 ka vendosur: *Konfirmimin në detyrë të subjektit të rivlerësimit, z. Rexhep Bekteshi, me detyrë gjyqtar në Gjykatën e Rrethit Gjyqësor Durrës*.”. Nga përmbajtja e vendimit rezulton se shqyrtimi i subjektit të rivlerësimit ka përfshirë vlerësimin pasuror, vlerësimin e figurës dhe vlerësimin profesional.

11. Rezulton se Vendimi nr. 143, datë 26.04.2019 i Komisionit të Pavarur të Kualifikimit ka pasur një gabim material në pjesën e mospërfshirjes në vendim të pjesës së kontrollit të figurës së subjektit të rivlerësimit. Me Vendimin nr. 4, datë 15.05.2019 Komisioni i Pavarur i Kualifikimit ka vendosur të korrigjojë gabimin material të vendimit, duke shtuar në pjesën arsyetuese kapitullin III që trajton kontrollin e figurës. Vendimi korrigjues është pjesë integrale e vendimit të korrigjuar.

12. Lidhur me verifikimin dhe kontrollin e integritetit, në zbatim të nenit 229 dhe 236 të Ligjit nr. 115/2016, të dispozitave të Ligjit nr. 45/2015, si edhe në zbatim të pikës 85 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, me shkresën nr. 112 prot., datë 17.04.2019, Këshilli ka dërguar formularin e aplikimit përkatës të plotësuar sipas ligjit nga kandidati Rexhep Bekteshi për kompetencë dhe shqyrtim Autoritetit për Informimin mbi Dokumentet e Ish-Sigurimit të Shtetit.

13. Autoriteti për Informimin mbi Dokumentet e Ish-Sigurimit të Shtetit, me shkresën nr. 550/8 prot., datë 10.05.2019, ka dërguar pranë Këshillit të Emërimeve në Drejtësi vendimin nr. 291, datë 09.05.2019, i cili përmban gjetjet dhe rezultatet e kontrollit të ushtruar për kandidatin Rexhep Bekteshi.

14. Këshilli i Emërimeve në Drejtësi, në datën 25.07.2019, ka njoftuar në rrugë elektronike kandidatin Rexhep Bekteshi lidhur me shkresën nr. 550/8 prot., datë 10.05.2019 të Autoritetit për Informimin mbi Dokumentet e Ish-Sigurimit të Shtetit, si edhe vendimin nr. 291, datë 09.05.2019, i cili përmban gjetjet dhe rezultatet e kontrollit të ushtruar ndaj tij, duke i kërkuar të paraqesë shpjegimet përkatëse deri me datë 26.07.2019.

15. Kandidati Rexhep Bekteshi, nëpërmjet rrugës elektronike, në datën 26.07.2019 ka paraqitur shpjegimet e tij pranë Këshillit të Emërimeve në Drejtësi.

16. Për verifikimin e kushteve dhe kriterëve ligjore të kandidimit, në zbatim të shkronjave “b”, “c” dhe “d” të pikës 1, pikës 2 dhe 3 të nenit 7/a të ligjit nr. 8577/2000, të nenit 237 dhe 240 të Ligjit nr. 115/2016, si edhe në zbatim të pikave 91-93 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, Këshilli ka shqyrtuar dokumentacionin përkatës të depozituar nga vetë kandidati Rexhep Bekteshi në momentin e kandidimit pranë organit të emërtesës që ka shpallur vendin vakant, si edhe të dhënat e dërguara nga Këshilli i Lartë Gjyqësor.

17. Në përfundim të veprimeve dhe procedurave të kontrollit dhe verifikimit, në zbatim të neneve 235, 236 dhe 237 të ligjit nr. 115/2016, si edhe të pikave 29, 75, 85 dhe 104 të Vendimit nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, duke vlerësuar paraprakisht se ka të dhëna që mund të sjellin ndalimin e kandidimit, anëtarja relatore e Këshillit znj. Arta Marku ka proceduar me përgatitjen e relacionit përkatës mbi gjendjen e faktit dhe të ligjit të zbatueshëm dhe e ka dërguar çështjen për shqyrtim në mbledhjen e Këshillit.

18. Në zbatim të pikës 33 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, Kryetari ka thirrur mbledhjen e Këshillit duke njoftuar anëtarët për zhvillimin e saj në datën 30.07.2019, rendin e ditës, si edhe duke i bashkëlidhur njoftimit materialet e çështjes. Në rendin e ditës është përfshirë edhe çështja me objekt shqyrtimin e gjetjeve në procedurën e verifikimit të kandidimit të z.Rexhep Bekteshi, për vendin vakant në Gjykatën Kushtetuese të shpallur nga Presidenti i Republikës në datën 07.02.2018.

19. Në zbatim të pikës 34 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, dita dhe koha e zhvillimit të mbledhjes, së bashku me relacionin e përgatitur nga relatori, i është njoftuar kandidati Rexhep Bekteshi.

20. I njëjti njoftim, së bashku me dokumentacionin e përgatitur nga relatori mbi veprimet e kryera gjatë procedurës së verifikimit, si edhe materiale të çështjes, i janë dërguar edhe Avokatit të Popullit.

21. Për zhvillimin e mbledhjes së Këshillit në datën 30.07.2019, rendin e ditës dhe relacionin e përgatitur janë njoftuar edhe subjektet që sipas ligjit ftohen të marrin pjesë në mbledhjet e Këshillit.

22. Dita dhe koha e zhvillimit të mbledhjes, si edhe rendi i ditës janë njoftuar publikisht edhe në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.

23. Në mbledhjen e Këshillit, pas relatimit të parashtruar nga anëtari relator dhe shpjegimeve mbi pyetjet sqaruese të drejtuara nga anëtarët e Këshillit, Këshilli dëgjoi mendimin e Avokatit të Popullit lidhur me mënyrën e procedimit të ndjekur për verifikimin e kandidatit Rexhep Bekteshi.

24. Në thelb, Avokati i Popullit, krahas qëndrimit të përgjithshëm se edhe për këtë rast nuk ka pasur nga KED në dispozicion dokumentacionin e plotë, ku bashkëlidhur akteve të procedurës së verifikimit mungojnë edhe një pjesë dokumenteve dhe përgjigjeve të sjella nga institucionet e që do të provonin deklaratimet e kandidatit, parashtrori se, në lidhje me gjetjen që rezultojnë nga vendimi nr. 291 datë 09.05.2019 i Autoritetit për Informimin mbi Dokumentet e Ish-Sigurimit të Shtetit, kjo gjetje duhet të sjellë ndalimin e kandidimit. Pavarësisht se mund të mos përbejë pengesë për vazhdimin e detyrës si gjyqtar të kandidatit, Avokati i Popullit ka qëndrimin se për tu emëruar në një detyrë si ajo e gjyqtarit në Gjykatën Kushtetuese, duhet pasur një standard më i lartë, qëndrim ky i mbajtur prej kohësh tashmë nga institucioni i Avokatit të Popullit.

II. Vlerësimi i Këshillit të Emërimeve në Drejtësi

25. Këshilli i Emërimeve në Drejtësi, duke u bazuar në dispozitat ligjore dhe ato nënligjore normative të zbatueshme për çështjen në shqyrtim, si edhe në rrethanat e faktit që rezultojnë në aktet që përmban dosja e kandidatit, vlerëson se duhet të procedojë me vendim për ndalimin e kandidimit të kandidatit Rexhep Bekteshi për vendin vakant në Gjykatën Kushtetuese, të shpallur nga Presidenti i Republikës në datën 07.02.2018.

26. Në pikën 4 dhe 5 të nenit 125 të Kushtetutës, parashikohet se :

“4. Gjyqtarët e Gjykatës Kushtetuese duhet të kenë arsim të lartë juridik, të paktën 15 vjet përvojë pune si gjyqtarë, prokurorë, avokatë, profesorë ose lektorë të së drejtës, nëpunës të nivelit të lartë në administratën publike, me një veprimtari të spikatur në fushën e së drejtës kushtetuese, të drejtave të njeriut ose në sfera të tjera të së drejtës.

5. Gjyqtari nuk duhet të ketë mbajtur funksione politike në administratën publike ose pozicione drejtuese në një parti politike gjatë 10 vjetëve të fundit përpara kandidimit. Kritere të tjera, si dhe procedura për emërimin dhe zgjedhjen e gjyqtarëve të Gjykatës Kushtetuese rregullohen me ligj.”

27. Në nenin 29 të ligjit nr. 45/2015 “Për të drejtën e informimit për dokumentet e ish-sigurimit të shtetit të Republikës Popullore Socialiste të Shqipërisë”, parashikohet se:

“ 1. Autoriteti ka detyrimin t’i përgjigjet çdo kërkesë të institucioneve kushtetuese dhe autoriteteve publike, lidhur me ekzistencën e informacioneve në dokumente të ish-Sigurimit të Shtetit, kur kjo kërkohet në kuadër të vlerësimit, sipas legjislacionit përkatës, të cilësive etike, morale dhe profesionale të kandidatëve për t’u emëruar ose ngritur në detyra si:

.....

ç) anëtarë të Gjykatës Kushtetuese;

2. Autoriteti i përgjigjet institucioneve kushtetuese dhe autoriteteve publike për zyrтарin që emërohet ose ngrihet në detyrë, përkatësisht nëse:

a) ka qenë ose jo person në ndjekje për spiunazh apo terrorizëm;

b) ka qenë ose jo bashkëpunëtor aktiv i ish-Sigurimit të Shtetit, sipas përcaktimeve të këtij ligji;

c) figuron ose jo në dokumentet e ish-Sigurimit të Shtetit.”.

28. Kandidati Rexhep Bekteshi është subjekt i procesit të rivlerësimit të gjyqtarëve dhe prokurorëve. Rezulton se Komisioni i Pavarur i Kualifikimit me Vendimin nr. 143, datë 26.04.2019 ka vendosur: *Konfirmimin në detyrë të subjektit të rivlerësimit, z. Rexhep Bekteshi, me detyrë gjyqtar në Gjykatën e Rrethit Gjyqësor Durrës.* Ky vendim ka marrë formë të prerë. Nga përmbajtja e vendimit rezulton se shqyrtimi i këtij subjekti të rivlerësimit ka përfshirë vlerësimin pasuror, vlerësimin e figurës dhe vlerësimin profesional.

29. Nga ana tjetër, Këshilli i Emërimeve në Drejtësi vëren se, lidhur me vlerësimin e figurës të subjekteve të rivlerësimit kalimtar, në objektin e hetimit dhe kontrollit të organeve të rivlerësimit kalimtar nuk përfshihen çështjet që trajtohen në ligjin nr. 45/2015, për të cilat, detyrimin e verifikimit e kanë organi i emërtesës dhe Këshilli i Emërimeve në Drejtësi në procesin e verifikimit dhe vlerësimit të kandidatëve për gjyqtar në vendet vakante të krijuara në Gjykatën Kushtetuese.

30. Prandaj, Këshilli i Emërimeve në Drejtësi, në zbatim të nenit 149/d të Kushtetutës, të pikës 4 të nenit 229 e 236 të ligjit nr.115/2016, nenit 29 të ligjit nr. 45/2015 dhe pikën 85 dhe 104 të vendimit të Këshillit të Emërimeve në Drejtësi nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, me shkresën nr. 112 prot., datë 17.04.2019, ka dërguar formularin e aplikimit përkatës të plotësuar sipas ligjit nga kandidati Rexhep Bekteshi për kompetencë dhe shqyrtim Autoritetit për Informimin mbi Dokumentet e Ish-Sigurimit të Shtetit.

31. Autoriteti për Informimin mbi Dokumentet e Ish-Sigurimit të Shtetit, me shkresën nr. 550/8 prot., datë 10.05.2019, ka dërguar pranë Këshillit të Emërimeve në Drejtësi vendimin nr. 291, datë 09.05.2019, i cili përmban gjetjet dhe rezultatet e kontrollit të ushtruar për kandidatin Rexhep Bekteshi. Në këtë vendim konkludohet se:

“a) shtetasi Z. Rexhep Bekteshi nuk ka qenë person në ndjekje për spiunazh apo terrorizëm;

b) shtetasi Z. Rexhep Bekteshi nuk ka qenë bashkëpunëtor aktiv i ish-Sigurimit të Shtetit;

c) shtetasi Z. Rexhep Bekteshi, figuron në detyrë hetues në dosjen hetimore për çështjen penale nr. 148, të arshivuar në Arkivin e Sistemit të Ministrisë së Punëve të Brendshme, të administruar nga Autoriteti, për një të pandehur me akuzën Agjitacion dhe propagandë armiqësore kundër shtetit, që përfshihet në fushën e veprimit të Ligjit nr. 45/2015 “Për të drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë”.

32. Në pjesën arsyetuese vendimin nr. 291, datë 09.05.2019 të sipërcituar, sillet në vëmendje konstatimi se kandidati Rexhep Bekteshi ka qenë hetuesi i kësaj çështje në vitin 1990 dhe se vepra penale objekt procedimi konsiderohet si krim politik.

33. Këshilli i Emërimeve në Drejtësi, në datën 25.07.2019, ka njoftuar në rrugë elektronike kandidatin Rexhep Bekteshi lidhur me shkresën nr. 550/8 prot., datë 10.05.2019 të Autoritetit për Informimin mbi Dokumentet e Ish-Sigurimit të Shtetit, si edhe vendimin nr. 291, datë

09.05.2019, i cili përmban gjetjet dhe rezultatet e kontrollit të ushtruar ndaj tij, duke i kërkuar të paraqesë shpjegimet përkatëse deri me datë 26.07.2019.

34. Kandidati Rexhep Bekteshi, nëpërmjet rrugës elektronike, në datën 26.07.2019 ka paraqitur shpjegimet e tij pranë Këshillit të Emërimeve në Drejtësi, duke parashtruar se:

“Siç kam deklaruar në dokumentet e paraqitura në aplikimin tim, për periudhën e viteve 1980 - 1991, kam punuar hetues në Hetuesinë e Rrethit Durrës. Kam hetuar çështje për vepra penale në Sektorin e Hetimit të "Veprave Penale Kundër Jetës dhe Shëndetit të Personit e Vjedhjes së Pasurisë" (sipas emërimit të kohës). Nuk kam qenë hetues për vepra penale kundër shtetit dhe nuk kam marrë pjesë në procese politike të posaçme. Referuar çështjes penale që përmendet nga Autoriteti për Informimin mbi Dokumentet e ish-Sigurimit të Shtetit, nuk mbaj mend konkretisht këtë rast, por mendoj se ky rast ka qenë çështje për vepër penale të "Vjedhjes së pasurisë" (që hetohej nga Sektori i lartpërmendur), e ndërthurur me "Agjitacion dhe propagandë". Kjo për faktin sepse Sektori i Hetimit "Veprave Penale kundër Jetës dhe Shëndetit të Personit e vjedhjes së pasurisë", nuk bënte hetime për çështjet e krimeve kundër shtetit.”.

35. Nisur nga rrethanat konkrete dhe specifike të çështjes në shqyrtim, Këshilli i Emërimeve në Drejtësi vlerëson se të dhënat që janë paraqitur nga AIDSSH lidhur me kandidatin Rexhep Bekteshi, përbëjnë motiv për të vlerësuar mospërbushjen nga ky kandidat të kushtit ligjor lidhur me integritetin e kandidatit për gjyqtar në Gjykatën Kushtetuese. Prandaj, bazuar në këto gjetje për verifikimin e figurës së kandidatit, në zbatim të pikës 5 të nenit 125 dhe nenit 147/d të Kushtetutës, të nenit 229 e 236 të ligjit nr.115/2016, nenit 29 të ligjit nr. 45/2015 dhe pikës 88 të Vendimit të Këshillit të Emërimeve në Drejtësi nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, Këshilli vlerëson se duhet të procedohet me ndalimin e kandidimit të kandidatit Rexhep Bekteshi për vendin vakant në Gjykatën Kushtetuese, të shpallur nga Presidenti i Republikës në datën 07.02.2018

36. Kushtet e kandidimit për gjyqtar në Gjykatën Kushtetuese, të parashikuara nga Kushtetuta dhe ligjet e nxjerra në pajtim me të, duhet të plotësohen secila dhe të gjitha së bashku në mënyrë që kandidati të pranohet për tu vlerësuar dhe renditur sipas meritave nga Këshilli i Emërimeve në Drejtësi dhe më tej për tu përzgjedhur gjyqtar i Gjykatës Kushtetuese nga organi i emërtesës.

37. Për rrjedhojë, nëse kandidati për gjyqtar në Gjykatën Kushtetuese nuk plotëson qoftë edhe njërin prej kushteve dhe kriterëve ligjore të kandidimit, kjo do të përbënte motiv ligjor të mjaftueshëm për Këshillin e Emërimeve në Drejtësi për të vënë në bisedim dhe për të disponuar ndalimin e kandidimit, pa qenë më e nevojshme të arsyetojë për plotësimin ose jo të kushteve të tjera ligjore.

38. Nisur nga sa analizohet dhe arsyetohet më sipër, bazuar në gjetjet dhe të dhënat e konstatuara gjatë procedurës së verifikimit që rezultojnë nga aktet dhe dokumentacionin që përmban dosja e kandidatit, në interpretim dhe zbatim të ligjit të zbatueshëm për kushtet dhe kriteret e kandidimit për gjyqtar në Gjykatën Kushtetuese, Këshilli i Emërimeve në Drejtësi vjen në përfundimin se duhet të vendoset ndalimi i kandidimit të kandidatit Rexhep Bekteshi për vendin vakant në Gjykatën Kushtetuese, të shpallur nga Presidenti i Republikës në datën 07.02.2018.

PËR KËTO ARSYE:

Në mbështetje të pikës 5 të nenit 125 dhe pikës 1 të nenit 149/d të Kushtetutës, të pikës 4 të nenit 229, pikës 5 të nenit 236 të Ligjit nr. 115/2016 “Për organet e qeverisjes së sistemit të drejtësisë”, nenit 29 të ligjit nr. 45/2015 “Për të drejtën e informimit për dokumentet e ish-sigurimit të shtetit të Republikës Popullore Socialiste të Shqipërisë”, si edhe të shkronjës “b” të pikës 50 dhe 88 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi

VENDOSI:

1. Ndalimin e kandidimit të kandidatit Rexhep Bekteshi, në vendin vakant për gjyqtar në Gjykatën Kushtetuese, të shpallur nga Presidenti i Republikës në datën 07.02.2018.
2. Në zbatim të nenit 238 të Ligjit nr. 115/2016, ky vendim i njoftohet kandidatit Rexhep Bekteshi.
3. Kandidati Rexhep Bekteshi ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.
4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

KRYETARI

Ardian DVORANI

